

〔清〕屈大均著
陳永正等校箋

屈大均詩詞編年校箋

五

中國古典文學叢書



〔清〕屈大均 著
陳永正等 校箋

屈大均詩詞編年校箋

五

上海古籍出版社

屈大均詩詞編年校箋卷十一

不編年詩一 古體

五言古詩

詠懷 十七首

至人握大象，長爲天下君。澄潭龍不見，噓氣成風雲。維彼蒲衣子，淵玄莫能倫。朝隱泰山霞，暮遊洪河津。仁義乃蘧廬，逍遙葆其真。春雷驚百卉，閭闔渙波鱗。時哉無與言，天倪一何神。

猿猴依杞楠，后羿不能射。至人與天遊，鼇鼉皆默化。利劍決浮雲，玄珠燭長夜。許由乃堯師，土苴治天下。得魚忘敝筍，驂螭任高駕。聖智貴潛行，毋使大盜假。懸瓢松樹間，風吹流泉瀉。哀彼塵垢子，死生如傳舍。

亭亭南海雲，變化如遊龍。朝冠扶桑日，暮舍閭闔風。光彩何熒熒，降我蕊珠宮。感子相羽翼，飄飄至崆峒。獲覩軒轅帝，心華開鴻濛。萬象無遯形，來朝寶鏡中。雙成爲舞女，子晉

爲歌童。遊戲太虛庭，誰能知所終。

駟馬尚可縻，去日苦難追。平生履虎尾，慷慨將何爲。轉蓬如車輪，隨風西北吹。故鄉路遼遠，瞻望涕漣而。子房久辟穀，顏如朝霞披。白龍何蜿蜒，與我遊天池。功業嗟未建，下民方調饑。潔身乃小節，誰能混鷗夷。蟬蛻王侯尊，聊且從吾師。

慶卿爲燕使，任俠不愛身。當時偕漸離，勢必殲強秦。委肉餓虎蹊，爲謀徒苦辛。用兵貴無形，窈冥如鬼神。風雲張羽翼，龍蛇效屈伸。尚父有韜鈴，變化存乎人。我昔觀魚復，八陣如星陳。江波激雄怒，巨石高嶙峋。玉女守其門，風后旋其輪。嗟哉先哲心，精微誰能臻。

仲秋寒節至，遊子無衣裳。慄慄此何氣，中人如斧戕。陰陽日交戰，龍血紛玄黃。上天徒暴怒，雷霆曾無傷。務光久沈淵，有窮登爲王。予其忍玩世，君臣有大綱。寧當猛虎步，不隨鴻鵠翔。勉哉疾固心，四澥聊徜徉。

薛公三千客，半是劍伎人。惜無王霸略，西向終事秦。上兵貴戰德，訓練宜精勤。八陣本無形，混沌如天輪。苟能準河圖，出沒驚鬼神。離離九皇星，光懸紫薇門。陽春而肅殺，一氣秉其鈞。予其欽若哉，遑敢懈晨昏。

仙人空桐子，變化如陰陽。朝霞一膏沐，神光流未央。忘身故委蛇，八極紛翱翔。伊予從之遊，矯掌承玉漿。日月如貫珠，吐納養其黃。莊生化蝴蝶，相遇鴻濛鄉。羽翼何葳蕤，餐花

臨扶桑。東海湧其波，浮雲四飛揚。堯軒去已久，斯民多憂傷。苟非姑射人，誰能應帝王。薄言稅吾駕，深山垂衣裳。

出門操天弧，吾將射四方。豺狼日爭食，曠野無人行。民生各有樂，好修予爲常。桃李羞同華，日月思齊光。曜靈久翳景，麗天誰文章。晞髮憑天門，北斗斟瓊漿。雖非丹山鸞，願巢阿閤旁。雌雄三十六，和鳴宣禎祥。

乘雲何踟躕，山中難久居。營營魂九逝，長夜懷憂虞。披衣起鳴琴，宮商慘不舒。聽者非佳人，鴟鴞紛罥予。上天降霜露，歲寒誰歡娛。碩果不可食，瓊華化爲荼。俯仰涕沾膺，何時旋故都。

遙遙望故鄉，魂魄所從始。狐死必首丘，遠遊今安止。嵩丘春載陽，三花何旒旒。時無洛川妃，誰發予瓊齒。有鳥自南來，丹翎紛不理。雄鳩雖巧言，苟合中誠耻。鶯獨夫何言，臨流淚如水。

吾劍雖短兵，其疾如電光。回旋應規矩，恍惚雙龍翔。今天降喪亂，日月顛其行。重華命百神，迎我朱陵岡。林巒亘千里，沅湘流湯湯。山鬼紛媚人，前驅從兩狼。忠誠夙所立，九死吾何傷。

長鯨吹海波，百川皆倒流。江妃何夭矯，持我歸蓬丘。昊天方降威，潛伏爲良猷。舍我朱離

天，來宅寒門幽。墳羊共藏井，騰蛇與相糾。君子貴知幾，柔順其無憂。
萋萋女貞木，變化何葳蕤。含此少陰精，隆冬葉不萎。夫何一佳人，懷忠適見疑。神靈附太
山，攀條吟以悲。天邊有匏瓜，流光照我姿。篤志慕陶嬰，苟合非所期。百川自東逝，北辰
無轉移。

大塊鼓噫氣，衆竅爲怒號。予口實興戎，縱橫變離騷。顧盼無四海，遑能媚其曹。泰山鬱嵯
峨，黃河流滔滔。丈夫無死生，萬物等鴻毛。

予幼好騏驥，萬里思橫行。白起不辱君，忠君愛其名。弓燥而手柔，秋天獵秦城。信行直如
弦，賢豪不我輕。後騎甘泉宮，前軍細柳營。風飄大胡笳，鳴鳴如龍鳴。

少年學神仙，披髮羅浮戲。麻姑愛玉顏，爲作芙蓉髻。簪以明月珠，拂以紅羅帔。吹笛東南
峰，紫鸞來嘒嘒。歡娛曾幾時，人世苦流離。君爲空中雲，我爲機上絲。將絲繫浮雲，纏綿
安可期。悠悠望蓬山，終古長相思。

【箋】

審詩意，當作于中年後。時恢復之事業已失敗，而壯心猶未息。

送陳十七

匹夫爲大俠，吾慕魯朱家。翩翩四公子，賢豪奚足誇。猛士處貧賤，神魚困泥沙。金鱗三十六，慘淡含朝霞。變化雖有時，奈此寒與饑。恩害日相生，欲報貴無私。暴虎而馮河，英雄所不爲。五賊在心中，運之如璇璣。去矣陳孺子，冠玉何權奇。天下在鼎俎，宰割其隨時。

贈萬生

寡婦得丹穴，禮抗萬乘君。百尺懷清臺，煌煌巴水濱。丈夫無貨財，爲德將何因。觀時得權變，白圭誠智人。東南市玉帛，西北貿馬牛。爲君富敵國，五行運其籌。握土成黃金，丹訣藏浮丘。關中日轉餉，地利如川流。功名何赫赫，誰知文終侯。

【箋】

萬生，名不詳。當爲貨殖者。

寄陳黃門

美人遊四海，滔滔傷不歸。鼉鼉銜左驂，中流援者誰。我欲拔劍去，路長無糧資。人馬皆饑餓，徬徨淚濡衣。駕言陟高岡，順風呼所期。吾子白衣冠，嗚咽前致辭。丈夫懷心膽，報德當乘時。母以天年終，聶政今何依。衆人鳥獸散，棄我忽如遺。逝將衽金革，與子同驅馳。但視滄浪天，莫顧黃口兒。

【箋】

審「衆人」數語，疑作于罷桂林監軍時。黃門，黃門侍郎，給事黃門侍郎之省稱，亦爲侍郎、給事之泛稱。陳黃門，指陳子升。桂王時爲給事中。

贈友五首

與君生南溟，噓噏雄百川。海波如連山，天地爭迴旋。蓬壺在鰲背，踟躕未登仙。念此下民咨，干戈方纏綿。大禹股無毛，仲尼席屢遷。至人貴拯物，俾世無顛連。鳥獸與同羣，松喬胡足賢。

玄雲無定體，應龍不常儀。昨日髡爲奴，今朝冠有綬。賢者重其死，與世聊委蛇。委蛇夫如何，有親方鋪糜。登高呼我友，來同季女饑。君爲爨下桐，我作薪中葵。持茲憂患身，柔順同文箕。有鰥昔在下，雷雨終弗迷。聊陳衾與裯，同寢待鳴鷄。

秋霜何凜冽，孤鳳寒無衣。摘藻如雲霞，五經徒紛披。微言在糟粕，千秋知者希。子志在春秋，我學惟著龜。陰陽道所貴，生殺其乘時。丹青亦寓言，遊藝聊自嬉。浩蕩象天形，山川相蔽虧。爲余貌山鬼，窈窕含憂思。靈修在毫素，終古見光儀。

三閭多微言，遊仙託荒誕。追琢風諫心，光彩爭雲漢。離騷能好色，九章多怨嘆。洋洋變風雅，發憤成波瀾。苟非宋玉招，精魂方越散。

神農削鴻梧，以合天人和。嗟余半死根，摧藏在山阿。蒙周生濁世，滑稽揚其波。湘纍亦寓言，荒淫爲九歌。變易吾儀容，雲氣象嵯峨。日月尚有瑕，丘陵亦孔訛。稱文雖渺小，其旨咸包羅。夫子誠知音，憫我如韓娥。行雲如可遏，更奏采菱荷。

【箋】

詩當作於歸隱鄉園後。

猛虎詞

朝負角弓出，暮負角弓歸。猛虎何斑斑，欲射憐其兒。惟虎尚有兒，惟人乃無妃。雄刀鳴牀東，雌刀躍牀西。雷雨何冥冥，蘭燈慘其輝。徬徨起中夜，恩怨交心脾。牝鷄方司晨，令我倒裳衣。裳衣且莫倒，奮發當有時。

贈陸氏及其從子

淒淒天上星，與我俱沈冥。匏瓜常自繫，河鼓難爲聲。吁嗟爾知己，相歡如平生。阮公賦詠懷，攜手八荒行。洋洋會風雅，從子與齊稱。昔焉馮大河，今焉履薄冰。妖姬自可求，漁父誰能名。

西臺雨後行田

蒙龍黃木洲，泛濫扶胥匯。池臺俯閭井，耕釣存風概。瀕海多塗泥，芳沃罕灌溉。春雨土膏滋，冬潮鹹氣退。燒鹽有餘稈，墾土無留塊。曰我沮溺人，耕慚微祿代。寧須富粳稻，但欲

除污萊。始晴命夫男，露田行不怠。汨汨引泉脈，蒼蒼悅山黛。虹生黃暈中，日出陰霞內。土圻百卉驚，基崩衆流潰。殷勤語我農，旨否嘗不逮。滂沱趣導渠，湍激宜安碓。在彼牛力償，在此鋤功貸。苗壯須附根，草肥或留菜。平生究水利，斥鹵亦所愛。盡力志溝洫，開荒喜草昧。王道始力田，子職期秉耒。踟躕盼有年，勤動終無悔。

【箋】

疑作于歸隱沙亭時。

鴻雁

鴻雁從風飛，氣力亦自愛。所憂霜雪寒，艱難來入塞。如何紆千山，羣雀啾啾在。高秋八九月，凍死乃無悔。物性苟知時，哲人生感慨。不見山梁雉，三嗅入茫昧。

古詩爲葉金吾壽

英雄日已老，顏色難長好。昔爲張子房，今作商山皓。吾將終羅浮，服食惟朱草。何以被四肢，蝴蝶大如箕。小翅爲下裳，大翅爲上衣。何以作棲宿，十圍籠簾竹。一節爲一房，兩節

爲一屋。何以爲儔侶，麻姑與玉女。作使五色禽，紛紛煉珠黍。何以充羽觴，玄碧酒如漿。飲之一呼吸，水露皆生香。有友金吾子，家在豐湖涘。吾令兩瀑布，流出桃花蕊。桃蕊是丹砂，君餐兼露華。復有蝙蝠好，雙棲芭蕉花。千年白如雪，紅者如朝霞。贈子白復紅，佩之衣帶中。能令男女媚，相愛長相同。白以佩吾子，紅以佩昭容。君姬字昭容。黃帝昔成仙，其術惟房中。素女爲之師，浮丘爲之宮。真人在玄牝，出入如虛空。日月一相摩，光彩成青童。吾慕魯女生，翩翩騎白龍。仙成上太華，毛女千人從。君今有窈窕，左右爭芙蓉。我亦容成子，大道在其躬。相將且駐年，紫髓而方瞳。時來建勳伐，乃追太保公。太保公諱夢熊，君之祖也。

【箋】

葉金吾，即葉維城，葉夢熊之孫。襲錦衣衛指揮同知僉事，因稱金吾。時葉氏居惠州，築泌園湖畔。

卧疾行

貞女長苦寒，介士長苦饑。吁嗟蕙蘭草，雨露不相滋。人情若流水，流水東以西。一日不膠漆，十日不相知。我有負薪憂，藥石誰見貽。一身事尊老，衣食無所資。爲子復爲婦，出門嘗遲遲。水精爲明月，一氣相光輝。月中有日影，如子在母懷。

送王子從軍

太白天將軍，夜來穿月出。光芒一何長，直使陰精失。吁嗟兵象見，變亂將無日。憐君虎豹姿，自此難安佚。子房青雲士，高尚素無匹。一朝去從軍，鞍馬如風疾。經營羅甸兵，左右哀牢帥。天心早能知，王命多論述。英雄方繽紛，囊括須高密。王侯寧有種，廝養亦膠漆。仲夏珠江湄，送君情洋溢。離支堆玉盤，花露甘如蜜。半醉即揚鞭，乳羊啖未畢。慷慨辭故人，故人多卓逸。羊裘釣澤中，亦有男子一。

【箋】

王子，名不詳。審詩中「羅甸」、「哀牢」之語，當爲送王子赴雲南永曆軍中。

曾公子櫻輓詩三首

公子少遊俠，甘心信陵君。玉顏舒茗華，長劍吐浮雲。賢豪與爭博，睚眦嘗下人。弦高思救鄭，晉鄙難摧秦。慷慨請兵符，肝腸感三軍。吁嗟烏合衆，爲陣何紛紜。橫戈當瞿唐，出沒如鬼神。我扼其咽喉，賊氣不得伸。士卒堅如山，對壘動兼旬。

朝廷詎無將，君獨奮布衣。手提五百人，不死其何歸。肌膚爲兜鍪，廝養爲神師。一夫先刈旗，賊驚刀相糜。奇兵無全勝，救援苦不來。彼爲泰山崩，我爲獨木支。衆寡終不敵，猛士咸瘡痍。人持一半冰，馬負一束萁。且戰且退走，驍騎憚不追。嗚呼蛇矛失，流涕滿邊陲。劇孟一敵國，條侯資其雄。如君勇蓋世，可無橫草功。烈士非徇名，王臣原匪躬。終軍乃自媒，少卿竟誰從。馬步勢懸絕，戰酣頻飲血。殺人慘無聲，陰風吹凜烈。徒手猶奮呼，百人無尺鐵。成敗天所私，吾謀將焉哲。嗚嗚隴頭水，沈沈沙場月。爲君歌國殤，淚流滿衣襟。

【箋】

曾子櫻，名不詳。疑爲監軍桂林時之死者。

贈徐處士

虎生而文炳，鳳鸞已五色。天性本自然，豈以文章飾。美才忌輕出，所志非官職。諸葛騁龍光，遊步以自適。亂世無全臣，欲仕非其國。四方正雲擾，大漢多蝨賊。撫弦復擲矢，不射非無力。荀彧王佐風，從曹至今惜。霜降草乃成，雪深梅始識。與君松柏姿，無苦歲寒逼。何以結久要，艱難事潛德。

【箋】

汪譜順治十六年：「徐善，字敬可，嘉興人。棄諸生，講求致知格物之學，有易論、春秋地名考等。詩外一有贈徐處士一首，疑即其人。朱彝尊有送徐處士善南還詩云云。謂其在洞庭書局與修一統志。」

贈孔參軍

丈夫志經營，豈曰生不辰。依人七尺賤，隱忍成埃塵。親壽如過隙，欲去還逡巡。狐裘裼素錦，玉氣爲女人。單步以負笈，英雄方苦身。與君同感激，酣飲娛青春。紫袖方吹簫，青綃持拂巾。上客列廣座，歡言相情親。文藻四輝映，綺思霞氤氲。如彼洞光珠，精靈燭百神。司馬秉冰鏡，林宗樂人倫。殷勤勗明德，及此白髮新。著作爲世師，豈敢辭苦辛。

壽吳雲遇先生

先帝諸詞臣，天南有其二。一惟我吳公，冠冕庶嘗士。三朝無實錄，史官久不備。簡討方須才，兼書行在事。公時當聖心，迴翔清切地。石室書初抽，崧臺草亦視。豈謂復西巡，君臣

忽相棄。霓旌若轉蓬，萬里追難至。匍匐返巖阿，天顏在寤寐。淵明居玉京，子真隱梅市。義不慕長生，所懷溝壑志。忽爾享期頤，神明以無累。先朝一耆舊，天留有深意。鬚髮雖皤然，精純若童稚。令子富才華，文章爲酒食。丹青與草書，一一供親嗜。鶴鳴喜在陰，天籟日相媚。父歌紫芝篇，子疏白華義。何以軒冕爲，山水娛仁智。歲寒獨後凋，努力爲蒼翠。蔭我半生枝，得成清廟器。

【箋】

吳龍禎，字雲御，號勿齋。南海人。永曆二年進士，授翰林院簡討。子文煒，能詩。

讀史贈陳獻孟並送其行

秦季焚詩書，先聖道以喪。諸儒負禮器，倉卒歸陳王。匹夫徒發憤，曾不識興亡。隱忍成功名，何如張子房。子房非儒者，爲氣何堅剛。其終如魯連，其始如荊卿。平生予所希，君亦慕其狂。終古兩盜雄，蘭池與博浪。少年雖輕發，氣實吞始皇。君於太公書，曾否得其綱。先公有兵略，令祖麗南先生著兵略百卷。揣摩宜不遑。將飛且伏翼，將鳴先引吭。何必魁岸人，始能應帝王。從容以步遊，遊於淮海旁。英雄無神師，其學不明光。苟能依老成，以禮

爲之方。我亦倜儻人，垂老猶摧藏。漢初兩孺子，不得與偕行。強忍亦已久，中夜起徬徨。君今血氣盛，甘苦未多嘗。思爲日本刀，須煉梅花鋼。屈伸能自如，入石乃無傷。行矣復遲遲，咫尺即相望。

【箋】

陳阿平，字獻孟，號雲士，又號鉢山居士，晚號愚溪。東莞人。後人編有陳獻孟遺詩。其祖陳象明，字麗南，一字旭庵。崇禎元年進士。累官湖南按察使。永曆元年爲兵部右侍郎，總督兩廣軍務。兵敗殉節。諡烈愍。撰有兵略。爲「東莞五忠」之一。明史有傳。陳阿平長居東莞，廣州。僅于少年時一度遠遊建陵。

江氏雙烈篇

鳳凰不孤生，雌鳩無再匹。姑婦苦相依，歲寒同一室。良人在泉下，幽幽視曠日。曠日久無光，光自妾心出。江家多女宗，禮義爲琴瑟。五婦垂彤管，復茲叔與姪。教子各成名，文章持篤實。湘也更多才，賢豪與膠漆。劍氣如白雲，玉光溫以栗。以母柏舟篇，相示淚洋溢。阿嫂亦陶嬰，黃鵠歌未畢。安得聖人生，列在變風一。